

摘藻堂四庫全書薈要

史部

欽定四庫全書薈要

史部

元史卷三十四至
六



詳校官主事銜臣徐以坤

欽定四庫全書薈要卷六千四百十三 史部

元史卷三十四

明翰林學士亞中大夫知制誥兼修國史宋濂等修

本紀第三十四

文宗三

至順元年春正月丙辰命趙世延趙世安領纂修經世大典事懷慶路饑賑鈔四千錠詔賜明宗妃溫綽歡伊埒實克布延呼圖克鈔幣有差以知樞密院事拜特穆



爾為遼陽行省左丞相戊午頒璽書諭雲南辛酉時享
太廟命回回司天監崇星壬戌中興路饑賑糶糧萬石
貧者仍賙其家甲子雅克特穆爾巴延辭丞相職不允
仍命阿榮趙世安慰諭之丁卯雲南諸王圖沁及萬戶
布呼阿哈奇徹等叛攻中慶路陷之殺廉訪司官執左
丞實都等迫令署諸文牘庚午芍陂屯及鷹坊軍士饑
賑糧一月辛未中書省臣言科舉會試日期舊制以二
月一日三日五日近歲改為十一十三十五請依舊制

從之壬申衡陽搖為寇掠湘鄉州癸酉以宣徽使薩都
復知樞密院事與奇徹台並領長密鄉乙亥賜雅克特
穆爾質庫一寧海州文登牟平縣饑賑以糧三千石丙
子衡州路饑總管王伯恭以所受制命質官糧萬石賑
之丁丑追封三寶努為郢城王諡榮敏名荆王之子托
克托穆爾赴闕趙世延請致仕不允命中書省製玉帶
二十賜官一品諸臣遣使齎金千五百兩銀五百兩詣
杭州書佛經賜海南大興龍普明寺鈔萬錠市永業地

戊寅賜隆禧總管府田千頃立荆襄等處平松等處田

賦提舉司並隸太禧宗禋院命陝西行省以鹽課鈔十

萬錠賑流民之復業者徭賦八百餘人寇石康縣己卯

封太醫院使阿哩雅為秦國公庚辰陞羣玉署為羣玉

內司秩正三品置司尉亞尉僉司司丞仍隸奎章閣學

士院禮部尚書庫庫兼監羣玉內司事辛巳改大都田

賦提舉司為宣農提舉司荆襄田賦提舉司為荆襄濟

農香戶提舉司平江提舉司為平江善農提舉司遣使

齋鈔三千錠往甘肅市鬻牛濠州去年旱賑糧一月大

名路及江荆諸路俱以去年旱告永平路以去年八月

電災告加封秦蜀郡太守李永為聖德廣裕英惠王其

子二郎神為英烈昭惠靈顯仁祐王二月壬午朔以趙

世安為御史中丞史惟良為中書左丞加知樞密院事

雅克布琳開府儀同三司籍張珪子五人家乙酉以西

僧嘉勒斡藏布卓特巴嘉勒燦並為烏斯藏土蕃等處

宣慰使都元帥雲南麓川等土官來貢方物揚州安豐

廬州等路饑以兩淮鹽課鈔五萬錠糧五萬石賑之真
定蘄黃等路汝寧府鄭州饑各賑糧一月丁亥命江南
陝西河南等處富民輸粟補官江南萬石者官正七品
陝西千五百石河南二千石江南五千石者從七品自
餘品級有差四川富民有能輸粟赴江陵者依河南例
其不願仕乞封父母者聽僧道輸已粟者加以師號徵
江淞江西湖廣賑糶糧價鈔赴京師己丑圖沁布呼等
攻陷仁德府至馬龍州調八番元帥鄂勒哲將八番達

爾軍軍千人順元土軍五百人禦之庚寅改萬聖祐國
興龍普明龍翔萬壽三提點所並為營繕都司秩正四
品萬安規運普慶營繕等八提點所並為營繕司秩正
五品以修經世大典久無成功命奎章閣額哩音特穆
爾和塔拉都哩默色等譯國言所紀典章為漢語纂修
則趙世延虞集等而雅克特穆爾如國史例監修開元
路呼爾哈萬戶府軍士饑給糧賑之辛卯以御史臺贓
罰鈔萬錠金千兩銀五千兩付太禧宗禋院供祭祀之

需賜雅克特穆爾給驛璽書以徵其食邑租賦奎章閣
學士和塔拉都哩默色薩題虞集辭職詔諭之曰昔我
祖宗睿知聰明其於致理之道自然生知朕以統緒所
傳實在眇躬夙夜憂懼自惟早歲跋涉艱難視我祖宗
既乏生知之明於國家治體豈能周知故立奎章閣置
學士員日以祖宗明訓古昔治亂得失陳說於前使朕
樂於聽聞卿等其推所學以稱朕意其勿復辭特默齊
驛戶及建康廣德鎮江諸路饑賑糧一月衛輝江州二

路饑賑鈔二萬錠寧國路饑嘗賑糧二萬石不足復賑

萬五千石癸巳衛輝路胙城新鄉縣大風雨災甲午自

庚寅至是日京師大霜晝穿立諸色民匠打捕鷹坊都

總管府秩正二品置奎章閣鑒書博士二人秩正五品

圖沁布呼等攻晉寧州圖沁自立為雲南王布呼為丞

相阿哈呼喇呼等為平章等官立城柵焚倉庫以拒命

乙未中書省言江淞民饑今歲海運為米二百萬石其

不足者來歲補運從之丙申雲南蒲蠻來朝賑常德澧

州路饑民丁酉帝及皇后皇子喇特納達喇並受佛戒
己亥命明宗皇子受佛戒監察御史言中書平章道拉
實職任台衡不思報效銓選之際紊亂綱紀貪污著聞
恬不知恥黜罷為宜從之徭賊入灌陽縣劫民財庚子
以兵興所收諸王額森特穆爾吹斯噶等印還給之壬
寅伊魯布哈辭御史大夫職不允土蕃等處民饑命有
司以糧賑之新安保定諸驛孳畜疫死命中書給鈔濟
其乏癸卯汴梁路封邱祥符縣霜災甲辰流旺沁之子

于吉陽軍乙巳詔封明宗皇子琳沁巴勒為廊王豫王
喇特納實哩所部千六百餘人饑賑糧二月淮安路民
饑以兩淮鹽課鈔五萬錠賑之丙午復以阿爾斯蘭哈
雅為江南行臺御史大夫命中尚卿蘇爾約蘇以兵討
雲南御史臺臣言竒徹台天厯初在上都常與庫庫楚
等謀執都爾蘇事泄同謀者皆死竒徹台以出征獲免
項臺臣疑而劾之不稱事情宜雪其枉從之丁未以巴
延知樞密院事依前太保錄軍國重事詔諭中書曰昔

在世祖以宰相一人總領庶務故治出於一政有所統
今雅克特穆爾為右丞相巴延既知樞密院事左丞相
其勿復置太禧宗禋院所隸總管府各置副達魯噶齊
一人賜豫王王傅官金虎符戊申命中書省及翰林國
史院官祭太祖太宗睿宗三朝御容以太禧宗禋使鄂
博哈雅為中書平章政事命史惟良及參知政事和尚
總督建言之事中書省臣言舊制正旦天壽節內外諸
司各有贊獻頌者罷之今江浙省臣言聖恩公溥覆憐

無疆而臣等殊無補報凡遇慶禮進表稱賀請如舊制
為宜從之降璽書申鹽法之禁以嘉興路崇德州民四
萬戶所輸租稅供英宗后妃歲賜錢帛詔諭樞密院以
屯田子粒鈔萬錠助建佛寺免其軍卒土木之役庚戌
茶陵州民饑同知萬嘉努江存禮以所受敕質糧三千
石賑之辛亥迤西蒙古驛戶饑給芻粟有差賑河南流
民復歸者鈔五千錠泰安州饑民三千戶真定南宮縣
饑民七千七百戶松江府饑民萬八千二百戶及土蕃多

爾濟沙克嘉萬戶部內饑命所在有司從宜賑之濟寧
路饑民四萬四千九百戶賑以山東鹽課鈔萬錠杭州
火賑糧一月命市故瀛國公趙瓘田為大龍翔集慶寺
永業御史臺臣言不必予直帝曰吾建寺為子孫黎民計
若取人田而不予直非朕志也察汗諾爾宣慰司所部
千戶察喇等衛饑者萬四千四百五十六人人給鈔一
錠三月甲寅命宣政院供顯懿莊聖皇后神御殿祭祀
乖西解蠻三千人入松梨山燒沿邊官軍營堡東平路

須城縣饑賑以山東鹽課鈔安慶安豐蘄黃廬五路饑
以淮西廉訪司贓罰鈔賑之丁巳徙濟陽王瑪納濟為
吳王吳王普爾普為濟陽王賜八番順元曲靖烏撒烏
蒙蒙慶羅羅斯嵩明州土官幣帛各一禁泛濫給驛四
川官吏脅從囊嘉特者皆復故職戊午封皇子喇特
納達喇為燕王立宮相府總其府事秩正二品雅克
特穆爾領之廷試進士賜圖烈圖王文蔚等九十七
人及第出身有差命彰德路歲祭姜里周文王祠以

河南行省平章竒珠為雲南行省平章八番順元宣慰使特穆爾布哈為雲南行省左丞從豫王由八番道討雲南賜明宗近侍七十人官有差裕宗及昭獻元聖皇后位宿衛三千人命儲政院給其衣糧易粟發米十萬石賑糶京師貧民癸亥遣諸王僧格巴勒薩題勒密實邁格分使西北諸王楊珠濟達保賽音伊濟貝等所甲子詔諭中外命御史大夫特穆爾布哈伊魯布哈振舉臺綱丁卯茂巴爾斯來貢蒲萄酒賜鈔幣有差以山東鹽

課鈔萬錠賑東昌饑民三萬三千六百戶已已議明宗
升祔序于英宗之上視順宗成宗廟遷之例辛未羣臣
請上皇帝尊號不許固請乃許之封知樞密院事布哈
特穆爾為武平郡王錄討雲南圖沁布呼之功雲南宣
慰使土官舉宗祿余並遙授雲南行省叅知政事餘賜
賚有差分龍慶州隸大都路諸王伊蘇台部七百餘人
入天山縣掠民財產遣樞密院宗正府官往捕之壬申
奉玉冊玉寶祔明宗神主于太廟濮州臨清館陶二縣

饑賑鈔七千錠光州光山縣饑出官粟萬石下其直賑
糶信陽息州及光之固始縣饑並以附近倉糧賑之甲
戌封諸王斯隆瑪為西寧王乙亥西番哈喇和卓來貢
蒲萄酒諸王駙馬還鎮錫賚有差丙子改山東都萬戶
府為都督府雲南木邦路土官渾都來貢方物河南登
封偃師孟津諸縣饑賑以兩淮鹽課鈔三萬錠鞏昌臨
洮蘭州定西州饑賑鈔三千五百錠沂莒膠密寧海五
州饑賑糧五千石中興峽州歸州安陸沔陽饑戶三十

萬有奇賑糧四月丁丑陞太常禮儀院秩正二品敕有
司供明宗后班布爾實宮分幣帛二百匹及阿達里托
果斯幣帛有差賜雅克特穆爾功勳之碑廣平路饑以
河間鹽課鈔萬三千錠賑之辛巳諸王哈爾滿來貢蒲
萄酒廣德太平集慶等路饑凡數百萬戶濮州諸縣蟲
食桑葉將盡夏四月壬午朔命西僧作佛事於仁智殿
自是日始至十二月終罷癸未置齊哩克昆錢糧都總
管府秩正三品中書省臣言各宮分及宿衛士歲賜錢

帛舊額萬人去歲增四千人邇者增數益廣宜依舊額
詔命鄂博哈雅裁省以聞甲申時享太廟丙戌封額爾
勤額布根為桓國公雅克特穆爾言天歷初阿蘇軍士
為國有勞請以鈔十萬錠米十萬石分給其家從之戊
子四川行省調重慶五路萬戶以兵救雲南庚寅中書
省臣言邇者諸處民饑累常賑救去歲賑鈔百三十四
萬九千六百餘錠糧二十五萬一千七百餘石今汴梁
懷慶彰德大名興和衛輝順德歸德及高唐泰安徐邳

曹冠等州饑民六十七萬六千戶一百一萬二千餘口
請以鈔九萬錠米萬五千石命有司分賑制曰可以陝
西饑敕有司作佛事七日壬辰以所籍張珪諸子田四
百頃賜大承天護聖寺為永業沿邊部落蒙古饑民八
千二百人人給鈔三錠布二匹糧二月遣還所部癸巳
置豫王王傅副尉司馬各二員丁酉遣諸王桑烏遜還
雲南金蘭等驛馬牛死賑鈔五百錠庚子降璽書申諭
太禧宗禋院天臨之醴陵湘陰等州台州之臨海等縣

饑各賑糶米五千石辛丑明宗后班布爾實崩壬寅括
益都般陽寧海田十六萬二千九十頃賜大承天護聖
寺為永業立益都廣農提舉司及益都般陽寧海諸提
領所並隸隆祥總管府烏蒙土官祿余殺烏撒宣慰司
官吏降于布呼羅羅諸蠻俱叛與布呼相應平章特穆
爾布哈為其所害晉寧建昌二路民饑賑糧五萬五千
石鈔二萬三千錠戊申陝西行臺言奉元鞏昌鳳翔等
路以累歲饑不能具五穀種請給鈔二萬錠俾分糶于

他郡從之雲南賊祿余以蠻兵七百餘人拒烏撒順元
界立關固守重慶五路萬戶軍至雲南境值羅羅蠻萬
餘人遇害千戶祝天祥等引餘衆遁還詔江淞河南江
西三省調兵二萬命諸王溫都遜特穆爾及樞密判官
洪浹將之與湖廣行省平章托歡會兵討雲南己酉作
佛事滄州高唐州屬縣蟲食桑葉盡芍陂屯饑賑糧二
月土蕃等處圖沙瑪民饑命有司賑之賑懷慶承恩孟
州等驛鈔千錠五月乙卯遣宣徽使鼎珠等以受尊號

告祭南郊故四川行省平章庫春四川道廉訪使呼爾
敦英額等皆為囊嘉特所害並贈官賜諡榆次縣主簿
塔斯特穆爾河中府判官圖德勒皆為遼東軍所害並
加褒贈戊午帝御大明殿雅克特穆爾率文武百官及
僧道耆老奉玉冊玉寶上尊號曰欽天統聖至德誠功
大文孝皇帝是日改元至順詔天下河南懷慶衛輝普
寧四路曾經賑濟人戶今歲差發全行蠲免其餘被災
路分人民已經賑濟者腹裏差發江淮夏稅亦免三分

己未羅羅斯權土官宣慰撒加伯阿漏土官阿刺里州
土官德益叛附于祿余庚申以受尊號恭謝太廟辛酉
四川行省討雲南進軍至烏蒙壬戌歸德府之譙縣霧
傷麥癸亥四川軍至雲南之雪山峽遇羅羅斯軍敗之
德州饑賑以山東鹽課鈔三千錠武昌路饑賑糧五萬
石鈔二千錠甲子申命雅克特穆爾為中書右丞相詔
天下以鈔四萬錠分給宮人賜魯國大長公主鈔萬錠
丁卯翰林國史院修英宗實錄成戊辰帝發大都次大

口陞尚舍寺秩正三品命額哩音特穆爾為大司徒遣豫
王喇特納實哩鎮西番授以金印賜諸王托歡金印大
司徒布呼齊銀印加趙世延翰林學士承旨封魯國公
賑衛輝大名廬州饑民鈔六千錠糧五千石開元路呼
爾哈萬戶府寧夏路哈喇齊千戶所軍士饑各賑糧二
月己巳次龍虎臺置肅王庫春傳尉司馬各一員辛未
置宣忠扈衛親軍都萬戶府秩正三品總烏魯斯軍士
隸樞密院以太禧宗裡使伊拉齊為中書平章政事左

右欽察龍翊侍衛軍士五千三百七十戶饑戶賑鈔二
錠布一疋糧一月癸酉遣使勞軍于雲南時諸王圖喇
率萬戶呼爾敦實克齊喇博羅等領兵進討圖沁布呼
甲戌八番乖西解苗阿馬察伯秩等萬人侵擾邊境詔
樞密臣分兵討之乙亥置順元宣撫司統達喇齊軍征
雲南人賜鈔五錠衛輝路之輝州以荒乏穀種給鈔三
千錠俾糴於他郡己卯遣使詣五臺山作佛事庚辰命
湖廣行省以鈔五萬錠給雲南軍需是月右衛左右手

屯田大水害禾稼八百餘頃廣平河南大名般陽南陽
濟寧東平汴梁等路高唐開濮輝德冠滑等州及大有
千斯等屯田蝗以浙東宣慰使陳天祐湖廣參知政事
樊楫死於王事贈封特加一級龍興張仁興妻鄒氏奉
元李郁妻崔氏以志節汴梁尹華以孝行皆旌其門六
月辛巳朔雅克特穆爾言嚮有旨惟許臣及巴延兼領
三職今趙世延以平章政事兼翰林學士承旨奎章閣
大學士引疾以辭帝曰朕重老成人其令世延仍視事

中書果病無預銓選可也丙戌大駕至上都戊子給左
右欽察龍翊侍衛軍士糧壬辰鎮江饑賑糧四萬石饒
州饑命有司賑之癸巳御史臺臣言宣徽院錢穀出納
無經以上供飲膳冒昧者多不稽其案牘則弊日滋宜
如舊制具實上之省部以備考覈從之丙申立行樞密
院討雲南賜給驛璽書十五銀字圓符五以河南行省
平章徹爾特穆爾知行樞密院事陝西行省平章特默
齊近侍嘉琿為同知副使發朶甘斯圖沙瑪及鞏昌諸

處軍萬三千人人乘馬三匹徹爾特穆爾同鎮西武靖
王吹巴勒等由四川嘉琿從豫王喇特納實哩等由八
番分道進軍黃河溢大名路屬縣沒民田五百八十餘
頃庚子以內侍中瑞卿薩里為大司徒賜四川行省左
丞博囉金虎符以鹽課鈔二十萬錠供雲南軍需命河
南湖廣江西甘肅行省誦藏經六百五十部施鈔三萬
錠知樞密院事庫春貝托克托穆爾通政使濟爾噶朗
翰林學士承旨嘉琿達巴顏額布根燕王宮相嘉琿達

烏魯斯中政使尚嘉努托噶台右阿蘇衛指揮使諾海
徹爾拜珠以謀變有罪並棄市籍其家癸卯四川博囉
以蒙古漸丁軍五千往雲南乙巳羅羅斯土官撒加伯
合烏蒙蠻萬人攻建昌縣雲南行省右丞伊爾特穆爾
拒之斬首四百餘級四川軍亦敗撒加伯于蘆古驛丙
午圍沙瑪蒙古民饑賑糧一月丁未改東路蒙古軍元
帥府為東路欽察軍萬戶府是月高唐曹州及前後武
衛屯田水災大都益都真定河間諸路獻景泰安諸州

及左都威衛屯田蝗迤北蒙古饑民三千四百人人給糧二石布二匹旌表真定梁子益妻李氏等貞節徐州胡居仁孝行秋七月辛亥封諸王阿固察為廣寧王授以金印壬子命西僧禁星丙辰以庫春貝大司徒印授薩里丁已命中書省翰林國史院官祀太祖太宗睿宗御容于大普慶寺命西僧為皇子燕王作佛事西域諸王保賽音遣使來朝賀監察御史請以所籍庫春貝衣物賜宿衛軍士從之己未以庫春貝宅賜太禧宗禋院

衣服賜羣臣通渭山崩壓民舍命陝西行省賑被災者
十二家庚申籍托克托穆爾家質輸內府辛酉改哈斯
罕萬戶府為總管府秩四品詔僧道獵戶鷹坊合得壘
書者翰林院無得越中書省以聞真定路之平棘廣平
路之肥鄉保定路之曲陽行唐等縣大風雨雹傷稼舒
蘇台蘇爾嘉額勒錦拜格等部獻人口牧畜命酬其直
江西建昌萬戶府軍成廣海者一歲更役來往勞苦詔
仍至元舊制二歲一更乙丑翰林學士承旨額爾吉訥

知樞密院事調諸衛卒築澠州柳林海子堤堰丙寅蒙
古百姓以饑乏至上都者閔口數給行糧俾各還所部
增大都賑糶米五萬石大都之順州東安州大風雨雪
傷稼戊辰壽寧公主薨收其印己巳命江淞行省以鈔
十萬錠至雲南增其軍需庚午歲星犯氐宿開平路雨
雹傷稼中書省臣言近歲帑廩虛空其費有五曰賞賜
曰作佛事曰創置衙門曰濫冒支請曰續增衛士鷹坊
請與樞密院御史臺各集賽官同加汰減從之御史臺

臣劾奏新除河南府總管張居敬避難不之官有旨免所授官加其罪笞甲戌賜諸王揚珠特穆爾博羅台青格斯齊敦罕等各金銀鈔幣有差丙子敕中書省御史臺遣官詣江淞江西湖廣四川雲南諸行省遷調三品以下官命四川行省於明年茶鹽引內給鈔八萬錠增軍需以討雲南賑穆稜竒里至苦鹽泊等九驛每驛鈔五百錠增給戍居庸關軍士糧海潮溢漂沒河間運司鹽二萬六千七百餘引丁丑以給驛壘書五銀字圓符

二增給陝西蒙古都萬戶府以討雲南故丞相特門德爾子將作使索珠與其弟觀音努姊夫太醫使阿哩雅坐怨望造符錄祭北斗呪咀事覺詔中書鞫之事連前刑部尚書烏瑪喇前御史大夫博羅上都留守瑪勒及阿哩雅姊烏訥實密遜等俱伏誅雲南圖沁布呼等勢愈猖獗烏撒祿余亦乘勢連約烏蒙東川茫部諸蠻欲令布呼弟巴雅斯等兵攻順元樞密臣以聞詔即遣使督豫王喇特納實哩及行樞密院四川雲南行省等五

會諸軍分道進討以烏蒙烏撒及羅羅斯地接西番與
碣門安撫司相為脣齒命宣政院督所屬軍民嚴加守
備又命鞏昌都總帥府調兵千人戍四川開元大同真
定冀寧廣平諸路及忠翊侍衛左右屯田自夏至于是
月不雨奉元晉寧興國揚州淮安懷慶衛輝益都般陽
濟南濟寧河南河中保定河間等路及武衛宗仁衛左
衛率府諸屯田蝗永平龐遵以孝行福州王薦以隱逸
大同李文實妻齊氏河南閻遂妻楊氏大都潘居敬妻

陳氏王成妻高氏以志節順德馬奔妻胡閏奴真定民妻周氏冀寧民妻魏益紅以夫死自縊殉葬並旌其門閏七月庚辰朔封諸王瑪展為永寧王授金印及給銀字圓符給驛壘書併賜以所隸封邑歲賦癸未遣諸王都稜呼圖克博囉等賞銀千兩幣二百匹賜諸王圖烈特穆爾監察御史葛明誠言中書平章政事趙世延年踰七十智慮耗衰固位苟容無補於事請斥歸田里臺臣以聞詔令中書議之雲南茫部路九村夷人阿幹阿

里詣四川行省自陳本路舊隸四川今土官撒加伯與雲南連叛願備糧四百石民丁千人助大軍進征事聞詔嘉其去逆效順厚慰諭之衛士上都駐冬者所給糧以三分為率二分給鈔大駕將還敕上都兵馬司官二員率兵士由偏嶺至明安巡邏以防盜賊市橐駝百牛三百充扈從屬軍之用丙戌忠翊衛左右屯田隕霜殺稼籍索珠阿哩雅等庫藏田宅奴僕牧畜給大承天護聖寺為永業鑄黃金神仙符命印賜掌全真教道士苗

道一已丑立掌醫署秩正五品庚寅以所籍阿哩雅宅
為都督府公署辛卯以陝西行臺御史中丞托音納爾
為中書叅知政事雅克特穆爾言趙世延向以年老屢
乞致仕臣等以聞有旨世延舊人宜與共政中書御史
之言不知前有旨也帝曰如御史言世延固難任中書
矣其仍任以翰林奎章之職四川行省平章汪壽昌言
雲南布呼叛逆興兵進討調遣餽餉皆壽昌領之頃以
市馬造器械軍官俸給軍士行糧已給鈔十五萬錠今

布呼未及殄滅而烏撒烏蒙相繼為亂大兵深入去朝
廷益遠元請軍需早乞頒降從本省酌其緩急便宜以
行庶不稽誤從之寧夏奉元鞏昌鳳翔大同晉寧諸路
屬縣隕霜傷稼癸巳以伊嚕特穆爾為大司徒賜哈喇
齊軍士鈔一萬錠糧十萬石察汗諾爾并東西涼亭諸
衛士九百五十人人賜鈔五錠糧二月朔漠軍士人鈔
三錠布二匹糧二月命雅克特穆爾以鈔萬錠分賜天
厯初諸王羣臣死事之家行樞密院言征戍雲南兵二

人逃歸捕獲法當死詔曰如臨戰陣而逃死宜也非接戰而逃輒當以死何視人命之易耶其杖而流之丁酉帝發上都授額哩音特穆爾大司徒印戊戌甘肅平章政事奈瑪台封宣寧郡王授以金印駙馬錦濟勒封鄂國公授以銀印並知行樞密院事贈安南國王陳益稷儀同三司湖廣行省平章政事王爵如故謚忠懿益稷在世祖時自其國來歸遂授以國王即居于漢陽府天厯二年卒至是加贈謚庚子魯王阿拉克實喇所部三

萬餘人告饑賑鈔萬錠糧二萬石中書省臣言內外佛
寺三百六十七所用金銀鈔幣不貲今國用不充宜從
裁省命省人及宣政院臣裁減上都歲作佛事百六十
五所定為百四所令有司永為歲例乙巳雲南使來報
捷遣使賜雲南四川省臣行樞密院臣以上尊丙午諸
王巴延特穆爾請給鞍馬願從諸軍擊雲南帝嘉其意
從之戊申加封孔子父齊國公叔梁紇為啟聖王母魯
國太夫人顏氏為啟聖王夫人顏子寃國復聖公曾子

邠國宗聖公子思沂國述聖公孟子鄒國亞聖公河南
伯程顥豫國公伊陽伯程頤洛國公羅羅斯土官撒加
伯及阿陋土官阿刺里州土官德益兵八千撤毀棧道
遣把事曹通潛結西番欲據大渡河進寇建昌四川行
省調碉門安撫司軍七百人成都保寧順慶廣安諸屯
兵千人令萬戶周戡統領直抵羅羅斯界以控扼西番
及諸蠻部又遣成都順慶二翼萬戶咎定遠等以軍五
千同印部知州馬伯所部蠻兵會周戡等從便道共討

之發成都沙糖戶二百九十人防遏敘州徵重慶夔州
逃士軍八百人赴成都廣西徠于國安率千五百人寇
修仁荔浦等縣廣西元帥府發兵捕之賊衆潰走生擒
國安大都大寧保定益都諸屬縣及京畿諸衛大司農
諸屯水沒田八十餘頃杭州常州慶元紹興鎮江寧國
諸路及常德安慶池州荆門諸屬縣皆水沒田一萬三
千五百八十餘頃松江平江嘉興湖州等路水漂民廬
沒田三萬六千六百餘頃饑民四十萬五千五百七十

餘戶詔江瀚行省以入粟補官鈔三千錠及勸率富人
出粟十萬石賑之寶慶衡永諸處田生青蟲食稼冠州
郁世復大都趙祥及弟英以孝行旌其門大都阿實克
坦塔珠瀋州劉仲溫以輸米賑貧旌其門八月庚戌河
南府路新安沔池等十五驛饑疫人給粟馬給芻粟各
一月辛卯雲南伊爾特穆爾以兵屯建昌執羅羅斯把
事曹通斬之丁巳北邊諸王伊濟貝遣使來京師雅克
特穆爾由西道田獵未至詔以機務至重遣使趣召之

已未大駕至京師勞遣人士還營有言蔚州廣靈縣地
產銀者詔中書太禧院遣人涖之歲所得銀歸大承天
護聖寺辛酉以世祖是月生命帝師率僧百七十八作
佛事七日御史臺臣請立燕王為皇太子帝曰朕子尚
幼非裕宗為燕王時比俟雅克特穆爾至共議之甲子
忠州土官黃祖顯遣子宗忠來朝獻方物乙丑遣使詣
真定玉華宮祀睿宗及顯懿莊聖皇后神御殿戊辰太
白犯氐宿壬申詔興舉蒙古字學中書省樞密院御史

臺言臣等比奉旨裁省衛士今定大內四宿衛之士每宿衛不過四百人累朝宿衛之士各不過二百人鷹坊萬四千二十四人當減者四千人內饗九百九十九人四集賽當留者各百人累朝舊邸宮分饗人三千二百二十四人當留者千一百二十八人勝臣齊哩克昆萬人當留者六千人其汰去者斥歸本部著籍應役自裁省之後各宿衛復有容匿漢南高麗人及奴隸濫充者集賽官與其長杖五十七犯者與曲給散者皆杖七十七沒

家貲之半以籍入之半賞告者仍令監察御史察之制
曰可九月庚辰江淞行省言今歲夏秋霖雨大水沒民
田甚多稅糧不滿舊額明年海運本省止可二百萬石
餘數令他省補運為便從之罷入粟補官例糴豆二十
三萬石於河間保定等路冠恩高唐等州出馬八萬匹
今諸路分牧之大寧路地震甲申授布呼齊及伊魯特
穆爾大司徒印史惟良辭中書左丞職不允命藝文監
以雅克特穆爾世家刻板行之命河南行省給湖廣行

省鈔四千錠為軍需討雲南遼陽諸王羅丹曼濟台諸部
擾民敕樞密院宗正府及行省每歲遣官偕往巡問治
其獄訟監察御史葛明誠劾奏遼陽行省平章哈喇特
穆爾嘗坐賊被杖罪今復任以宰執控制東藩亦足見
國家名爵之濫黜罷為宜從之丙戌印部州土官馬伯
嚮導征雲南軍有功以為征進招討知本州事江西湖
廣蒙古軍進征雲南者人給鈔五錠雲南羅羅斯叛與
成都甚邇而成都軍馬俱進征雲南詔四川鄰境諸王

發藩部丁壯二千人成成都廣源賊弗道閉覆寇龍州
羅回洞龍州萬戶府移文詰安南國其國回言本國自
歸順天朝恪共臣職彼疆我界盡歸一統豈以羅回元
隸本國遂起爭端此蓋邊吏生釁假閉覆為名爾本府
宜自加窮治湖廣行省備其言以聞命龍州萬戶府申
嚴邊防已丑熒惑犯鬼宿辛卯賜陝西蒙古軍之征雲
南者三十人人鈔六錠監察御史多羅台王文若言嶺
北行省乃太祖肇基之地武宗時太師伊徹察喇為右

丞相太傅達爾罕為左丞相保安邊境朝廷遂無北顧之患今天子臨御乃命哈瑪爾圖為平章政事其人無正大之譽有鄙俚之稱錢穀甲兵之事情無所知豈能昭宣皇猷贊襄國政且以伊徹察喇輩居於前而以斯人繼其後賢不肖不待辨而明理宜黜罷制曰可癸巳白虹貫日置麓川路軍民總管府復立總管府於哈喇和卓甲午熒惑犯鬼宿積尸氣封魏王阿穆爾克子阿嚕為西靖王乙未以立冬祀五福十神太一真君御史

臺臣劾奏前中書平章蘇蘇叨居台鼎專肆貪淫兩經
杖斷一百七方議流竄幸蒙恩宥量徙湖廣不復畏法
自守而乃攜妻娶妾濫污百端况湖廣乃屯兵重鎮豈
宜居此乞屏之遠裔以示至公詔永竄雷州湖廣行省
遣人械送其所丙申以魯國大長公主邸第未完復給
鈔萬錠命中書平章伊拉齊董其役己亥以奎章閣纂
修經世大典命省院臺諸司以次宴其官屬以平江等
處官田五百頃賜魯國大長公主敕諸人非其本俗敢

有弟收其嫂子收庶母者坐罪壬寅覈實諸衛軍戶物
力賜魯國大長公主鈔萬錠命雅克特穆爾詣邸第送
之丙午命西僧作佛事於大明殿史惟良復乞辭職歸
養兄其請仍賜鈔二百錠丁未中書參知政事張友諒
為左丞知樞密院事圖卜台為陝西行臺御史大夫特
穆爾穆稜等三十二驛自夏秋不雨牧畜多死民大饑
命嶺北行省人賑糧二石至治初以白雲宗田給壽安
山寺至是其僧沈明琦以為言有旨令中書省改正之

敕有司繕治南郊齋宮遼陽行省碩達勒達路自去夏
霖雨黑龍松阿哩二江水溢民無魚為食至是邁拉遜
一十五狗驛狗多餓死賑糧兩月狗死者給鈔補市之
辰州萬戶圖古勒布哈母舒穆魯氏以志節漳州龍溪
縣陳必達以孝行並旌其門冬十月戊申朔降璽書申
飭行聖公崇奉孔子廟事賜雲南行省叅政呼達沙三
珠虎符辛亥命湖廣行省給諸王溫都遜特穆爾幣百
匹以賞將士捕猺賊有功者壬子諸王大臣復請立燕

王為皇太子帝曰卿等所言誠是但燕王尚幼恐其識慮未宏不克負荷徐議之未晚也立宣忠扈衛親軍都萬戶營於大都北市民田百三十餘頃賜之戊午致齋大明殿己未遣亞獻官中書右丞相雅克特穆爾終獻官特穆爾布哈率諸執事告廟請以太祖皇帝配享南郊庚申出次郊宮辛酉帝服大裘袞冕祀昊上帝于南郊以太祖皇帝配禮成是日大駕還宮甲子以奉元驛馬瘠死命陝西行省給鈔三千錠補市之瑪納和實

袞所居諸牧人三千戶瀕黃河所居鷹坊五千戶各賑
糴兩月乙丑廣西獠賊寇橫州及永淳縣敕廣西元帥
府率兵捕之樞密院臣言每歲大駕幸上都發各衛軍
士千五百人扈從又發諸衛漢軍萬五千人駐山後蒙
古軍三千人駐官山以守關梁乞如舊數調遣以俟來
年從之辛未烏蒙路土官阿朝歸順遣其通事阿累等
貢方物壬申御史臺臣言內外官吏令家人受財以其
干名犯義罪止笞四十七解任貪汚者緣此犯法愈多

請依十二章計贓多寡論罪從之甲戌敕累朝宮分官
署凡文移無得稱皇后止稱某位下娘子其委用官屬
並由中書擬聞乙亥改打捕鷹坊總管府為仁虞都總
管府知樞密院事薩都宣徽使騰吉斯並賜達爾罕之
號中書省臣言近討雲南已給鈔二十萬錠為軍需今
費用已盡鎮西武靖王吹巴勒及行省行院復求鈔如
前數臣等議方當進討之際宜依所請給之制曰可賜
伯夷叔齊廟額曰聖清歲春秋祠以少牢遣使趣四川

雲南行省兵進討於是四川行省平章達春引兵由永寧左丞博囉引兵由青山茫部並進陳兵周泥驛及祿余等戰殺蠻兵三百餘人祿余衆潰即奪其關隘以導順元諸軍時雲南行省平章竒珠等俱失期不至十一月庚辰命中書賑糶糧十萬石濟京師貧民辛巳御史臺臣言陝西行省左丞齊喇坐受人僮奴一人及鸚鵡請論如律詔曰位至宰執食國厚祿猶受人生口理宜罪之但鸚鵡微物以是論賊失於太苛其從重者議罪

今後凡饋禽鳥者勿以贓論著為令癸未賑上都樂河
駐冬各宮分齊哩克昆萬五千七百戶糧二萬石甲申
熒惑退犯鬼宿命帝師率西僧作佛事內外八所以是
日始歲終罷丙戌太白犯壘壁陣中書省臣言至元間
安豐安慶廬州等路有未附籍戶千四百三十六世祖
命以其歲賦賜綽和爾後既附籍所輸歲賦皆入官別
令萬億庫歲給以鈔二百錠今乞停所給鈔復以其戶
賜綽和爾之子雅克特穆爾從之羅羅斯撤加伯烏撒

阿荅等合諸蠻萬五千人攻建昌伊爾特穆爾等引兵
追于木托山下敗之斬首五百餘級賑襄鄧輝和爾民
被西兵害者六十三戶戶給紗十五錠米二石被西兵
掠者五百七十七戶戶給鈔五錠米二石廣西廉訪司
言今討叛徭各行省官將兵二萬人屯駐靜江遷延不
進曠日持久恐失事機詔遣使趣之知樞密院事雅克
布琳請依舊制全給鷹坊芻粟使毋貧乏帝曰國用皆
百姓所供當量入為出朕豈以鷹坊失所重困吾民哉

不從辛卯以庫庫台知樞密院事給山東鹽課鈔三千錠賑曹州濟陰等縣饑民癸巳以臨江吉安兩路天源延聖寺田千頃所入租稅隸太禧宗禋院戊戌立打捕鷹坊紅花總管府於遼陽行省秩四品辛丑徵河南行省民間自實田土糧稅不通舟楫之處得以鈔代輸命陝西行省賑河州蒙古屯田衛士糧兩月甲辰命司天監崇星丙午恩州諸王昂輝坐擊傷巡檢張恭杖六十七謫還廣寧王所部充軍役十二月戊申詔遣巴延等

以將立燕王喇特納達喇為皇太子告祭于郊廟已酉
以董仲舒從祀孔子廟位列七十子之下國子生積分
及等者省臺集賢院奎章閣官同考試中式者以等第
試官不中者復入學肄業以粟十萬石米豆各十五萬
石給河北諸路牧官馬之家宣忠扈衛烏魯斯屯田官
給牛種農具辛亥立燕王喇特納達喇為皇太子詔天
下甲寅西域軍士居永平灤州豐潤玉田者人給鈔三
錠布二匹糧兩月監察御史言昔裕宗由燕邸而正儲

位世祖擇耆舊老臣如王顥姚燧蕭軒等為之師保賓
客今皇太子仁孝聰睿出自天成誠宜慎選德望老成
學行純正者俾之輔導於左右以宏養正之功實宗社
生民之福也帝嘉納之詔龍翔集慶寺工役佛事江南
行臺悉給之戊午以十月郊祀禮成帝御大明殿受文
武百官朝賀大赦天下癸亥知樞密院事庫庫台兼大
都留守乙丑遣集賢侍讀學士珠爾噶詣真定以明年
正月二十日祀睿宗及后于玉華宮之神御殿丁卯命

西僧於興聖光天宮十六所作佛事癸酉詔宣忠扈衛
親軍都萬戶府凡立營司境內所屬山林川澤其鳥獸
魚鼈悉供內膳諸獵捕者坐罪甲戌御史中丞和尚坐
受婦人為賂遇赦原罪監察御史言和尚所為貪縱有
污臺綱罪雖見原宜追奪所受制命禁錮元籍終其身
臺臣以聞制可敕各行省凡遇邊防有警許令便宜發
兵緩則驛聞賑龍慶州懷來縣前歲被兵萬一千八百
六十戶糧兩月冀寧路梁世明妻程氏中興路巴延妻

阿勒達爾台以志節大都宛平縣鄭珪以行義並旌
其門賑遼陽行省所居鷹坊戶糧一月

元史卷三十四

元史卷三十四考證

並領長密卿 按元官制無長密卿樞密院亦無卿名
惟長信寺長秋寺設卿長密應長信或長秋之訛然
他無可考今因原文而附識其疑于此

辛卯 原刻作二月辛卯朔考上文二月係壬午朔以
甲子推之此處癸巳之上應有辛卯日而誤書朔今
改正

嘉興路崇德州 原刻作崇德縣考地理志元貞元年

升縣為州于此自應書州今據志改

黑龍松阿哩二江水溢 原刻松阿哩作宋瓦乃音譯
之訛蓋松阿哩即松花江故與黑龍江並稱也

欽定四庫全書薈要卷六千四百十四 史部

元史卷三十五

明翰林學士亞中大夫知制誥兼修國史宋濂等修

本紀第三十五

文宗四

二年春正月己卯御製奎章閣記行樞密臣言去歲十一月仁德府權達嚕噶齊庫楚糾集兵衆討雲南首敗布呼賊兵于馬龍州是月十一日殺布呼弟巴延獻馘

于豫王十三日戰于馬金山獲布呼及其弟巴延徹爾其黨拜布哈布延特穆爾等十餘人誅之餘兵皆潰獨祿余猶據金沙江有旨趣進兵討之庚辰住持大承天護聖寺僧寶峯加司徒辛巳大名魏縣民曹革輸粟賑陝西饑旌其門癸未立侍正府以總近侍秩從二品乙酉時享太廟丙戌巴延伊魯特穆爾伊魯布哈鄂博哈雅等十四人並以本官兼侍正旌大都大興縣郭仲安妻李氏貞節丁亥以壽安山英宗所建寺未成詔中書

省給鈔十萬錠供其費仍命雅克特穆爾薩題等總督
工役命後衛指揮使史垣往四川行省調軍官選戊子
命奴圖克齊阿里和卓按行北邊牧地以晉邸部民劉
元良等二萬四千餘戶隸壽安山大昭孝寺為永業戶
中書省臣言達春圖卜特穆爾等討雲南以去歲十一
月九日領兵至烏撒周泥驛明日祿余阿奴阿荅等賊
兵萬餘自山後間道潛出達春圖卜特穆爾等進擊屢
敗之十五日戰七星關六日凡十七戰賊大敗潰去詔

遣使以銀幣賞達春圖卜特穆爾等造歲額鈔本至元鈔八十九萬五千錠中統鈔五千錠給鈔五千錠賑寧海州饑民罷益都等處廣農提舉司改立田賦總管府秩從三品仍隸隆祥總管府命興和路建雅克特穆爾鷹棚樞密院臣言四川行省地鄰烏撒而雲南未平今戍卒單少宜增兵防遏請調夔路齊哩克昆戶丁七百重慶河東五路兩營兵三百同往戍之俟征進軍還日悉罷遣從之庚寅改東路蒙古軍萬戶府為東路蒙古

侍衛親軍指揮使司諸王哈爾滿遣使來貢葡萄酒國
制累朝行帳設衛士給事如在位時近嘗汰其冗濫武
宗仁宗兩朝各定為八百人英宗朝七百人中書省臣
言舊給事人有失職者詔復其百人辛卯皇太子喇特
納達喇薨壬辰命宮相法里及給事者五十八人護靈
輦北柩葬于山陵仍令法里等守之御史臺臣劾奏福
建宣慰副使哈濟前為廣東廉訪副使貪污狼籍宜罷
黜從之己亥遣吏部尚書薩爾幹佩虎符禮部郎中趙

期頤佩金符賚即位詔告安南國且賜以授時歷賜武
寧王齊齊克圖金百兩銀五百兩以為安路之海寧州為
食邑癸卯以皇子古嚕達喇疹疾愈賜雅克特穆爾及
公主察球爾各金百兩銀五百兩鈔二千錠薩都等金
銀鈔各有差賜醫巫乳媪宦官衛士六百人金三百五
十兩銀三千四百兩鈔五千三百四十錠甲辰敕每歲
四祭五福太一星建孔子廟于後衛至元末討諸王納
延之叛獲其部蒙古軍分置河南江浙湖廣江西諸省

命樞密院遣使括其數得二千六百人乙巳封蒙古巫
者所奉神為靈感昭應護國忠順王號其廟曰靈祐給
衛士萬人歲例鈔人八十錠內以他物及粟折五之一
鎮西武靖王吹巴勒豫王喇特納實哩及行省行院官
同討雲南兵十餘萬以去年十一月十一日吹巴勒師
次羅羅斯期伊爾特穆爾俱至三泊郎仍趣蘇爾約蘇
會于曲靖馬龍等州同進兵伊爾特穆爾倍道兼進奪
金沙江十二月十七日大兵與阿哈蒙古軍相值戰敗

之阿哈偽降明日率其兵三千為三隊來襲我營吹巴勒伊爾特穆爾等分十三隊又擊敗之阿哈竄走大兵直趣中慶二十六日遇賊黨蒙古軍于安寧州與再戰又大敗之二十八日阿哈來逆戰遂就禽斬于軍前三十日將抵中慶賊兵七千猶拒戰于伽橋古壁口兵交伊爾特穆爾左頰中流矢洞耳後拔矢復與戰大捷遂復行省治諸軍皆會駐于城中分兵追捕殘賊于嵩明州樞密院臣以捷聞詔總兵官量度緩急從宜區處新

添安撫司甕河寨主訴他部猺獠蹂其禾民饑命湖廣
行省發鈔二千錠市米賑之二月丙午以上都留守奈
瑪台行嶺北行樞密院事太禧宗禋使錦濟勒達朗達
爾瑪聶呼四人並知院事選授平章政事戊申立廣教
總管府以掌僧尼之政凡十六所曰京畿山後道曰河
東山右道曰遼東山北道曰河南荆北道曰兩淮江北
道曰湖北湖南道曰浙西江東道曰浙東福建道曰江
西廣東道曰廣西兩海道曰燕南諸路曰山東諸路曰

陝西諸路曰甘肅諸路曰四川諸路曰雲南諸路秩正

三品府設達嚕噶齊總管同知府事判官各一員宣政

院選流內官擬注以聞總管則僧為之四川行省招諭

懷德府驢谷什用等四洞及生蠻十二洞皆內附詔陞

懷德府為宣撫司以鎮之諸洞各設長官司及巡檢司

且命各還所掠生口湖廣參政徹爾特穆爾與蘇蘇巴

勒丹怨望鞫問得實刑部議當徹爾特穆爾巴勒丹杖

一百七蘇蘇處死會赦徹爾特穆爾流廣東巴勒丹廣

西蘇蘇徙海南皆置荒僻州郡有旨此輩怨望于朕向
非赦原俱當寘之極刑可俱籍其家蘇蘇禁錮終身已
酉白虹貫日旌鞏昌金州民杜祖隆妻張氏志節樞密
院臣言徹爾特穆爾博羅以正月戊寅敗烏撒蠻兵射
中祿余降其民烏蒙東川易良州蠻兵夷獠等俱已款
附鎮西武靖王吹巴勒等駐中慶復行省事豫王喇特
納實哩等至當當驛安輯其人民又言澂江路蠻官郡
容報賊呼喇呼及圖沁之弟巴爾圖默色等偽降于豫

王而反圍之至易龍驛呼喇呼等兵掩襲官軍四川行
省平章達春頓兵不進平章竒珠妻子孳畜為賊所掠
謀知圖沁方修城堡布兵拒守無出降意詔速進兵討
之敕特默齊軍士歲以五月十日遷處山後諸州辛亥
建雅克特穆爾居第于興聖宮之西南詔薩題及留守
司董其役壬子太白晝見中書平章政事伊拉齊兼瀋
陽等路安撫使燕王宮相巴咱爾為中書平章政事陝
西行臺中丞多爾濟巴勒為中書參知政事戶部尚書

高履亨兩淮都轉運鹽使許有壬並參議中書省事甲寅雅克特穆爾言賽音克呼木台英宗時獻寶貨于昭獻元聖太后議給鈔十二萬錠故相拜珠奏酌七萬錠未給泰定間以鹽引萬六百六十道折鈔給之今有司以詔書奪之還官臣等議以為寶貨太后既已用之宜以鹽引還之從之雅克特穆爾又言安慶萬戶索珠坐令家人殺人繫獄久未款伏宜若無罪乞釋之制曰可乙卯太白犯昴祀太祖太宗睿宗御容雲南統兵官來

報捷諸蠻悉降唯祿余追捕未獲命番休各衛漢軍十之二以三月一日放遣丁巳駙馬布延特穆爾自北邊從武寧王齊齊克圖來朝己未命西僧為皇子古魯達喇作佛事一周歲壬戌徙武寧王齊齊克圖為剌王賜金印甲子中書省臣言國家錢穀歲入有額而所費浩繁是以不足天歷二年嘗以鹽賦十分之一折銀納之凡得銀二千餘錠今請以銀易官帑鈔本給宿衛士卒又言陛下不用經費不勞人民創建大承天護聖寺臣

等願上嚮所易鈔本十萬錠銀六百錠助建寺之需從之丙寅以太祖四大行帳世留朔方不遷者其馬駝孳畜多死損發鈔萬錠命內史府市以給之行樞密院都事阿里和卓來報雲南之捷庚午給宿衛士歲例鈔詔毋出定額萬人之外占城國遣其臣高溫都爾來朝貢創建五福太一宮于京城乾隅修上都洪禧崇壽等殿諸王齊齊克圖沙格妄言不道詔安置齊齊克圖廣州沙格雷州壬申命遼陽行省發粟賑國王多爾濟及納

古爾岱爾等六部軍民萬五千戶旌大都民劉德仁妻
王氏貞節甲戌給宣讓王王傅印荆王伊蘇額布根貢
犛牛命田賦總管府稅鑛銀輸大承天護聖寺命興和
路為伊嚕布哈作鷹棚雲南景東甸蠻官阿只弄遣子
罕旺來朝獻馴象乞陞甸為景東軍民府阿只弄知府
事罕旺為千戶常賦外歲增輸金五十兩銀七百兩許
之以山東鹽課鈔萬錠賑膠州饑命龍翊衛以屯田歲
入粟贍衛卒孤貧者是月深冀二州有蟲食桑為災三

月丙子朔熒惑犯鬼宿辛巳御史臺臣劾奏燕南廉訪

使布扎爾前為閩海廉訪使受贓計鈔二萬二千餘錠

金五百餘兩銀三千餘兩男女生口二十二人及它寶

貨無算雖遇赦原乞追奪制命籍沒流竄詔如所言仍

暴其罪示天下壬午賜南郊侍祠文武官金幣有差特

令沙津阿固齊喇特納實哩為三藏國師賜以玉印以

陝西鹽課鈔萬錠賑察汗諾爾蒙古饑民癸未割外府

幣帛各千匹輸之中宮以供需用甲申繪皇太子真容

奉安慶壽寺之東蓋頂殿祀之如累朝神御殿儀鞫宦者拜珠侍皇太子疹疾飲食不時進以酥拭其眼鼻又為襪杖一百七斤出京城冠州有蟲食桑四十餘萬株御史臺臣言奎章閣參書雅勒呼阿媚奸臣所為不法宜罷職從之丙戌雨土霾巴咱爾辭所兼儲政使不允巴延娶諸王女賜金二百兩銀千兩賜上都死事者布延特穆爾等十一家鈔各百錠賜雅克特穆爾鷹坊百人中書省臣言宣課提舉司歲權商稅為鈔十萬餘

錠比歲數不登乞凡僧道為商者仍征其稅有旨誠為
僧者其仍免之司徒竇沙言陶弘景胡笳曲有負辰飛
天歷終是甲辰君之語今陛下生年紀號實與之合此
竇受命之符乞錄付史館頒告中外詔令翰林集賢奎
章禮部雜議之翰林諸臣議以謂唐開元間太子賓客
薛讓進武后鼎銘云上玄降監方建隆基為玄宗受命
之符姚崇表賀請宣示史官頒告中外而宋儒司馬光
斥其采偶合之文以為符瑞乃小臣之諂而宰相實之

是侮其君也今弘景之曲雖于生年紀號若偶合者然
陛下應天順人紹隆正統于今年薄海內外罔不歸
心固無待于旁引曲說以為符命從其所言恐啟讖緯
之端非所以定民志事遂寢趙王巴哩納食邑沙淨德
寧等處蒙古部民萬六千餘戶饑命河東宣慰發近倉
糧萬石賑之又發山東鹽課鈔朱王倉粟賑登萊饑民
興和倉粟賑保昌饑民戊子以西僧諤尼德巴迪爾班
第為三藏國師賜金印以龍慶州之流杯園池水磴土

田賜雅克特穆爾命諸王阿勒楚爾鎮陝西以籍入蘇
蘇巴勒丹徹爾特穆爾貲產賜大承天護聖寺為永業
浙西諸路比歲水旱饑民八十五萬餘戶中書省臣請
令官私儒學寺觀諸田佃民各從其主假貸自賑餘則
勸分富家及入粟補官仍益以本省鈔十萬錠并給僧
道度牒一萬道從之旌同知大都府事孟古圖嚕默色
妻呼穆蘇貞節己丑賑雲內州饑民及察呼涼樓戍兵
共七千戶庚寅命威順王庫春布哈還鎮湖廣癸巳詔

累朝神御殿之在諸寺者各製名冠之世祖曰元壽昭
睿順聖皇后曰睿壽諾爾布皇后曰懿壽裕宗曰明壽
成宗曰廣壽順宗曰衍壽武宗曰仁壽文獻昭聖皇后
曰昭壽仁宗曰文壽英宗曰宣壽明宗曰景壽召亳州
太清宮道士馬道逸汴梁朝天宮道士李若訥河南嵩山
道士趙亦然各率其徒赴闕修普天大醮賑浙西鹽丁
五千餘戶命伊嚕布哈作佛事于德興府監察御史劾
江浙行省平章通通荒泆宴安才非輔佐詔免其官豫

王喇特納實哩鎮西武靖王吹巴勒等禽雲南諸賊額
默根羅羅托克托穆爾博勒已居激江路總管羅羅布
哈布呼之叔沁達罕偽署萬戶哈喇岱爾及諸將校悉
斬之磔尸以徇賑遼陽境內蒙古饑民萬四千餘戶旌
山丹州郝榮妻李閏貞節陝州諸縣蝗八番軍從征雲
南者俱屯貴州樞密院臣請遣使發粟給之己亥御史
臺臣劾奏大都總管劉原仁稱疾久不視事及遷同知
儲政院事即就職僥倖巧宦避難就易有旨罷之庚子

以將幸上都命西僧作佛事于乘輿次舍之所壬寅以
欽察衛軍士增多析為左右二衛給雲南行省鈔十萬
錠以備軍資民食癸卯御史臺臣劾奏工部尚書蘇炳
性行貪邪詔罷之大同路累歲水旱民大饑裁節衛士
馬芻粟自四月一日始壽王托里齊陽翟王特穆爾齊
西平王袞布巴勒昌王巴拉實哩等七部之民居遼陽
境者萬四千五百餘戶饑命遼陽行省發近境倉糧賑
兩月命宣靖王邁努置王傳等官立宮相都總管府秩

正三品給銀印以儒學教授在選數多凡仕由內郡江
淮者注江西江浙湖廣由陝西兩廣者注福建由甘肅
四川雲南福建者注兩廣敕河南行省右丞諾海提督
境內屯田中書省臣言嘉興平江松江江陰蘆場蕩山
沙塗沙田等官地其嘗賜他人者今請改賜雅克特
穆爾有旨雅克特穆爾非他臣比其令所在有司如數
給付發通州官糧賑檀順昌平等處饑民九萬餘戶以
山東鹽課鈔三千五百錠賑益都三萬餘戶是月陝西

行省遣官分給復業饑民七萬餘口行糧賑諸王巴延額布根部內蒙古饑民千餘口真定汴梁二路恩冠晉冀深蠡景獻等八州俱有蟲食桑為災旌故戶部主事趙野妻柳氏貞節夏四月丙午朔全寧民王托歡獻銀鑛詔設銀場提舉司隸中政院中書樞密臣言天厯兵興諸領軍與敵戰者宜定功賞臣等議諸王各金百兩銀五百兩金腰帶一織金等幣各十八匹諸臣四戰以上者同三戰及一戰者各有差有旨賞格具如所議雅

克特穆爾首倡大義躬擐甲冑巴延在河南先誅攜貳

使朕道路無虞兩人功無與比賞不可與衆同其賜雅

克特穆爾七寶腰帶一金四百兩銀九百兩巴延金腰

帶一金二百兩銀七百兩受賞者凡九十六人用金二

千四百兩銀萬五千六百兩金腰帶九十一副幣帛千

三百餘疋命西僧于五臺及霧靈山作佛事各一月為

皇太子古嚕達喇祈福以糧五萬石賑糶京師貧民戊

申皇姑魯國大長公主薨以宮中高麗女子布延塔納

賜雅克特穆爾高麗國王請割國中田為資送遣使往受之發衛卒三千助建大承天護聖寺庚戌詔建雅克特穆爾生祠于紅橋南樹碑以紀其勲御史臺臣言平章政事曹立累任江浙今雖閔廢猶與富民交納宜遣還其本籍大同路又監察御史萬嘉律嘗薦中丞和尚托克托嘗舉廉訪使布扎爾今和尚布扎爾俱以贓罪除名萬嘉律托克托難任本職並從之真定武陟縣地震逾月不止壬子命雅克特穆爾總制宮相都總管府

事額布勒巴咱爾俱以本官兼宮相都總管府都達噶
噶齊諸王哈爾滿遣使來朝貢甲寅改宣忠扈衛親軍
都萬戶府為宣忠烏魯斯扈衛親軍都指揮使司賜銀
印中書省臣言越王圖喇在武宗時以紹興路為食邑
歲割賜本路租賦鈔四萬錠今其子喇特納寶哩襲王
號宜歲給其半從之乙卯時享太廟鎮西武靖王吹巴
勒等已平雲南各遣使來報捷諸王圖烈納鎮雲南品
甸自以貨力給軍協力討賊詔以襲衣賜之丙辰葺太

祖所御大行帳戊午以集慶路玄妙觀為大元興崇壽宮命興和建屋居海青上都建屋居鷹鵠庚申特命河南儒士吳炳為藝文監典簿仍予對品階寧國路涇縣民張道殺人為盜道弟吉從而不加功居囚七年不決吉母老無他子孫中書省臣以聞敕免死杖而出之俾養其母辛酉以山東鹽課鈔五千錠賑博興州饑民九千戶一千錠賑信陽等場鹽丁御史臺臣言儲政使哈扎爾布哈侍陛下潛邸時受馬七十九疋又盜用官庫

物天歷初領兵蘆溝橋迎敵即逃擅閉城門驚惑民庶
度支卿納克楚嘗匿官馬又矯增制命又受諸王沃濟
七寶帶一鈔百六十錠臣等議其罪宜杖一百七除名
斥還鄉里從之壬戌樞密院臣言雲南事已平鎮西武
靖王吹巴勒言蒙古軍及哈刺章羅羅斯諸種人叛者
或誅或降雖已畧定其餘黨逃竄山谷不能必其不反
側今請留荆王伊蘇額布根及諸索諾木等各領所部
屯駐一二歲以示威重從之仍命豫王喇特納實哩分

兵給特默齊三百奇徹伯三百共守一歲以鎮輯之餘
軍皆遣還所部統兵官召赴闕時已命特默齊為雲南
行省平章政事遂命總制境內軍事潞州潞城縣大水
癸亥諸王鄂勒哲額布根所部蒙古民二百八十餘戶
饑命河東宣慰司發官粟賑之甲子陝西行省言終南
屯田去年大水損禾稼四十餘頃詔蠲其租鎮寧王諾
海部曲二百以風雪損孳畜命嶺北行省賑糧兩月奇
徹台以名園為獻命御史臺給贓罰鈔千錠酌其直諸

王策巴言臣每歲扈從時巡為費甚廣臣兄豫王喇特納寶哩弟伊實巴勒歲給鈔五百錠幣帛各五千匹敢援例以請制可詔故尚書省丞相托克托可視三寶努例以所籍家貲還其家御史臺言同僉中政院事殷仲容姦貪邪佞冒哀居官詔黜之揚州泰興縣饑民萬三千餘戶河南行省先賑以糧一月後以聞許之命遼陽行省發粟賑博囉部內蒙古饑民戊辰奎章閣以纂修經世大典請取翰林國史院托卜齊延一書以紀太祖

以來事蹟詔命翰林學士承旨雅克布哈塔斯哈雅雅克布哈言托卜齊延事關祕禁非可令外人傳寫臣等不敢奉詔從之增置拱衛司儀仗命武備寺諸匠官避元籍特召趙世延于集慶詔以泥金輝和爾字書無量壽佛經干部壬申散遣宣忠扈衛新籍軍士六百人還鄉里期以七月一日還營衡州路屬縣比歲旱蝗仍大水民食草木殆盡又疫癘死者十九湖南道宣慰司請賑糧米萬石從之河中府蝗晉寧冀寧大同河間諸

路屬縣以旱不能種告饑甘州阿爾斯蘭密珪妻呼圖
克德濟以貞節旌其門五月丙子皇太子影殿造祭器
如裕宗故事敕建宮相都總管府公廨丁丑熒惑犯軒
轅左角賜宮相都總管府給驛璽書調衛兵浚金水河
己卯安南世子陳日焯遣其臣段子貞來朝貢安慶之
望江縣淮安之山陽縣去歲皆水災免其田租丙戌太
禧宗裡院臣言累朝所建大萬安等十二寺舊額僧三
千一百五十人歲例給糧今其徒猥多請汰去九百四

十三人制可常德府桃源州去歲水災免其租丁亥復立齊哩克昆提舉司仍隸中政院命樞密院調卒修京城已丑置雲南等處宣慰司都元帥府以土官昭練為宣慰使都元帥又置臨江元江等處宣慰司兼管軍萬戶孟定路孟育路並為軍民總管府秩從三品者線蒙慶甸銀沙羅等甸並為軍民府秩從四品孟併孟廣者樣等甸並設軍民長官司秩從五品益都路宋德讓趙仁各輸米三百石賑膠州饑民九千戶中書省臣請依

輸粟補官例子官從之賑駐冬衛士二萬一千五百戶
糧四月庚寅立雲南省蘆傳路軍民總管府以土官為
之制授者各給金符癸巳雲南威楚路之蒲蠻猛吾來
朝貢願入銀為歲賦詔為置散府一及土官三十三所
皆賜金銀符甲午太白犯畢宿封宣政使托音為薊國
公以平江官田五百頃立稻田提舉司隸宮相都總管
府乙未以陝西行臺御史大夫圖卜台知樞密院事御
史大夫伊嚕布哈累辭職江南行省平章多爾濟以疾

辭新任並許之托果斯娘子繼主明宗幄殿詔賜湘潭州民戶四萬為湯沐奎章閣學士院纂修皇朝經世大典成詔以泥金書佛經一藏丙申大駕幸上都四川行省平章汪壽昌辭職不允敕在京百司日集公署自晨及暮毋廢事賑灤陽桓州李陵臺實保齊實呼圖五驛鈔各二百錠桓州民以所種麥獻詔賜幣帛二匹慰遣之戊戌次紅橋視雅克特穆爾生祠以太禧宗禋院所隸昭孝營繕司隸崇禧總管府賑遼陽東路蒙古萬戶

府饑民三千五百戶糧兩月已亥額爾吉納知行樞密院事八番西蠻官阿馬路奉方物入貢高郵寶應等縣去歲水免其租庚子太陰犯太白辛丑太白經天改阿蘇萬戶府為宣毅萬戶府賜銀印命巴延領之旌濟南章邱縣馬萬妻晉氏志節癸卯加額爾吉納太尉賜銀印以河間鹽課鈔四千錠賑河西屬縣饑民四千一百戶甲辰詔通政院整治內外水陸驛傳宣政院臣言舊制列聖神御殿及諸寺所作佛事每歲計二百十六今

汰其十六為定式制可東昌保定二路濮唐二州有蟲
食桑寧夏紹慶保定德安河間諸路屬縣大水六月乙
巳朔徵儲政院鈔三萬錠給中宮道路之用敕河南行
省立鄂博哈雅政蹟碑監察御史韓元善言歷代國學
皆盛獨本朝國學生僅四百員又復分辨蒙古色目漢
人之額請凡蒙古色目漢人不限員額皆得入學又監
察御史陳守中言請凡仕者親老別無侍丁奉養不限
地方名次宜從優附近遷調庶廣忠孝之道皆不報發

米五千石賑興和屬縣饑民丁未太白晝見乙卯監察御史陳良劾浙東廉訪使托克托濟延阿附權姦都爾蘇其生母何氏本父之妾而兄妻之欺誑朝廷封溫國夫人請黜罷憲職追還贈恩御史臺臣以聞詔從之旌大都右警巡院胡德妻曹氏貞節壬戌以鈔萬五千錠賑國王多爾濟等九部蒙古饑民三萬三百六十二戶癸亥詔諸官吏在職役或守代未任為人行賕闕說即有所取者官如十二章論賊吏罷不敘終其身雖無所

取訟起滅由已者罪加常人一等甲子太府監頌宮嬪
閤宦及宿衛士行帳資裝免控鶴衛士當驛戶丙寅雲
南出征軍悉還烏撒羅羅蠻復殺戍軍黃海潮等撒加
伯又殺掠良民為亂命雲南行省及行樞密院凡境上
諸關戍兵未可輕撤宜視緩急以制其變丁卯太陰犯
畢太白犯井庚午以揚州泰興江都二縣去歲雨害稼
免今年租樞密院臣言征西萬戶府軍七百人自泰定
以來累經優卹放還者四百五十人今邊防軍少例定

追使還營從之是月晉寧額齊訥二路旱濟寧路蟲食桑河南晉寧二路諸屬縣蝗大都保定真定河間東昌諸路屬州縣及諸屯水彰德路臨漳縣漳水決秋七月甲戌朔賜野馬川等處駐冬衛士衣藝文少監歐陽玄言先聖五十四代孫襲封衍聖公爵最五等秩登三品而用四品銅印于爵秩不稱詔鑄從三品印給之德安府去年水免今年田租旌德安應山縣高可燾孝行已卯以雲南既平惟祿余等懼罪竄伏降詔曲赦之辛巳

珠爾噶岱爾坐罪當流遠以騰吉斯舅氏故釋之壬午
祀太祖太宗睿宗御容于翰林國史院監察御史張益
等言竒微台在英宗朝陰與中政使耀珠造謀誣告托
歡徹爾將構異圖辭連潛邸致出居海南及天歷初都
爾蘇據上都遣竒微台以兵拒命都爾蘇疑其有異志
復禽以歸即追言昔日耀珠之謀以自解皇上即位不
念舊惡擢居中書而又自貽厥咎以致奪官籍產旋復
釋宥以為四川平章今雲南未平與蜀接境其人反覆

不可信任宜削官遠竄仍沒入其家產臺臣以聞詔奪

其制命金符同妻孥禁錮于廣東毋籍其家仍詔諭御史

凡儉人如竒微台者其極言之毋隱特穆爾布哈辭御

史大夫職不允乙酉遣使代祀護國庇民廣濟福惠明

著天妃命西僧于大都萬歲山憫忠閣作佛事起于八

月八日至車駕還大都日止丁亥海南黎賊作亂詔江

西湖廣兩省合兵捕之諸王楚斯節伊特甘布喀爾滿

駙馬鄂勒哲特穆爾遣使獻葡萄酒壬辰以知樞密院

事圖卜台為御史大夫癸巳辰州興國二路蟲傷稼免
今年租甲午歸德府雨傷稼免今年租給諸衛士及蒙
古戶糧四月乙未立閔子書院于濟南杭州火賑被災
民百九十戶丁酉調甘州兵千人薩里輝和爾兵五百
守贊布凌以防土番戊戌封巴延為浚寧王賜金印仍
前太保知樞密院事高郵府去歲水災免今年租湖州
安吉縣大水暴漲漂死百九十一人給鈔二十貫瘞之
存者賑糧兩月庚子廣西徭賊平召諸王溫都遜特穆

爾還辛丑懷德府洞蠻二十一洞田先什用等以方物
來貢還所虜生口八百餘人給其家癸卯知行樞密院
事徹爾特穆爾以兵討叛蠻鎖力哈迷失戮其黨七百
餘人是月河南奉元屬縣蝗大都河間漢陽屬縣水冀
寧屬縣雨雹傷稼廬州去年水寧夏霜為災並免今年
田租賑靈夏鳴沙蘭山二驛戶二百九十定州新軍戶
千二百應理州民戶千三百糧各一月又賑龍興路饑
民九百戶糧一月大寧和衆縣何干妻柏都賽兒夫亡

以身殉葬旌其門八月甲辰朔日有食之封托琳和塔
拉為靖恭王實喇卜多爾濟為懿德王並給塗金銀印
西域諸王保賽音遣使和爾多卜丹來朝灤陽驛戶增
置馬牛各一免其和市雜役立上都孔子廟碑御史臺
臣劾奏宣徽副使僧格奉旨給宿衛士錢糧稽緩九日
玩法欺公罪當黜罷從之己酉以銀符二十八賜拱衛
直百戶命雅克特穆爾以鈔萬錠賜蒙古孤寡者辛亥
大駕南還大都壬子西域諸王達爾瑪襲圖烈特穆爾

之位遣諸王保勒濟雅台等來朝貢甲寅蘇布特之孫
伊嚕特穆爾瑪魯額森來獻錫喇諾特賜金百兩銀千
五百兩鈔五百錠金帶一命宣課提舉司毋收雅克特
穆爾邸舍商貨稅鄂爾多斯之地屢災畜牧多死民戶
萬七千一百六十命內史府給鈔二萬錠賑之乙卯太
白犯軒轅大星丙辰封內史齊哩克為豐國公以星變
令羣臣議赦丁巳命邠王巴延特穆爾獵于撫州己未
立鎮寧王總管府于撫州公主托克托呼來朝以汴梁

路尉氏縣賜已延為食邑詔刑部鞫內侍實喇布哈巫
盡事凡當死者杖一百七流廣東西中書省臣言明年
海運糧二百四十萬石已令江浙運二百二十萬河南
二十萬今請令江浙復增二十萬本省參政杜貞督領
從之復命賑糴米五萬石濟京城貧民旌濟寧路魏鐸
孝行揚州路呂天麟妻韋氏貞節庚申太白犯軒轅左
角中書樞密臣言西域諸王保賽音其臣克呼木台矯
王命來朝保賽音遣使來言請執以歸臣等議宗藩之

國行人往來執以付之不可宜令乘驛歸國以自辨制
可壬申陞侍正府秩正二品是月江浙諸路水潦害稼
計田十八萬八千七百三十八頃景州自六月至是月
不雨澧州泗州等縣去年水免今年租沅州饑賑糶米
二千石金州西和州頻年旱災民饑賑以陝西鹽課鈔
五千錠九月癸酉朔市諤爾根薩里宅命雅克特穆爾
奉皇子古嚕達喇居之中書省臣言今歲當飼馬駝十
四萬八千四百匹京城飼六萬匹餘令外郡分飼每匹

給芻粟價鈔四錠從之乙亥命留守司發軍士築駐蹕臺于大承天護聖寺東御史臺臣劾奏四川行省參政馬鎔發糧六千石餉雲南軍中道輒還預借俸鈔一十九錠以娶妾又詬罵平章汪壽昌罪雖蒙宥難任宰相帝曰綱常之理尊卑之分情無所知其何以居上而臨下亟罷之丙子太白犯填星樞密院臣言雲南東川路總管普折兄那具會祿余兵殺烏撒宣慰使伊嚕東川路府判嘉琿達二十餘人又會布呼姪額芬蒙古兵將

擊羅羅斯臣等與雅克特穆爾議遣西域指揮使索珠
等發陝西都萬戶府兵直抵羅羅斯發碣門安撫司兵
絕大渡河直抵邛部州巡守闕隘詔宣政院亦遣使同
往督之海南賊王周糾率十九洞黎蠻二萬餘人作亂
命調廣東福建兵隸湖廣行省左丞伊喇薩納統領討
捕之阿蘇及烏魯斯新戍邊者命遼陽行省給其牛具
糧食己卯發粟五千石賑興和路鷹坊庚辰樞密院臣
言六月中行樞密院官以兵與烏撒賊兵五戰破之惟

祿余竄伏未獲命四川行省給其軍餉賑興和寶昌州
饑民米二千石御史臺臣言大聖壽萬安寺壇主司徒
嚴吉祥盜公物畜妻孥宜免其司徒壇主之職從之禁
諸驛毋畜竄行馬免控鶴戶雜役湖州安吉縣久雨太
湖溢漂民居二千八百九十戶溺死男女百五十七人
命江浙行省賑卹之丁亥御史臺臣言江西行省參政
李允中乃故內侍李邦寧養子器質庸下誤叨重選宜
黜罷從之庚寅幸大承天護聖寺以鈔五萬錠及預貸

四川明年鹽課鈔五萬錠給行樞密院軍需祿余寇順
元路癸巳罷供需府覆實司置廣誼司秩正三品以右
丞薩題領其務御史臺臣劾太禧宗裡使通通淫侈不
潔不可以奉明裡又奎章閣鑒書博士柯九思性非純
良行極矯譎挾其末技趨附權門請罷黜之乙未以金
虎符賜中書平章政事伊拉齊思州鎮遠府饑賑米五
百石丁酉雲南行省遣都事諾海鎮撫欒智等奉詔往
諭祿余及授以參政制命至撒家關祿余拒不受俄而

賊大至諾海因與力戰賊乃退及晚烏撒兵入順元境
右丞特穆爾布哈禦戰諾海復就陣宣詔招之遂遇害
特穆爾布哈等斂兵還壬申改隆祥總管府為隆祥使
司秩從二品冬十月甲辰遣秘書太監王珪等代祀嶽
鎮海瀆后土乙巳詔行樞密院徹爾特穆爾蘇爾約蘇
還朝以前東川路總管普折子安樂襲其父職己酉時
享于太廟為皇子古嚕達喇作佛事釋在京死罪囚二
人杖罪者四十七人辛亥召江南行臺御史大夫阿爾

斯蘭哈雅赴闕癸丑幸大承天護聖寺蒙古都元帥齊

喇引兵擊阿哈賊黨于靖江路海中山為雲梯登山破

其柵殺賊五百餘人圖沁之弟必里克圖庫圖齊舉家

赴海死獲圖沁弟二人子三人誅之甲寅杭州火命江

浙行省賑其不能自存者丁巳中書省臣言江浙平江

湖州等路水傷稼明年海漕米二百六十萬石恐有不

足若令運百九十萬而命河南發三十萬江西發十萬

為宜又遣官齎鈔十萬錠鹽引三萬五千道于通潯陵

滄四州優價和糴米三十萬石又以鈔二萬五千錠鹽引萬五千道于通瀨二州和糴粟豆十五萬石以鈔三十萬錠往遼陽懿綿二州和糴粟豆十萬石並從之燒在京積年還倒昏鈔二百七十餘萬錠戊午詔還平江路大王清昭應宮田百頃官勿徵其租己未給宿衛士有官者芻豆諸王保賽音使者還西域詔酌其所貢藥物價直辛酉命西僧作佛事于興聖宮十有五日乃罷吳江州大風雨太湖溢漂沒廬舍孳畜千九百七十家

命江浙行省給鈔千五百錠賑之乙丑立昭功萬戶都
總使府巴延特穆爾布哈並兼昭功萬戶都總使丙寅
命大都路定時估每月朔望送廣誼司以酌物價雅克
特穆爾獻所取西域犛牛五千十一月壬申朔日有食
之雲南行省言亦乞不薛之地所牧國馬歲給鹽以每
月上寅日啖之則馬健無病比因布呼叛亂雲南鹽不
可到馬多病死詔令四川行省以鹽給之乙亥李彥通
蕭布呼齊等謀反伏誅丙子封諸王沃濟為保寧王賜

以印其先所受印賜諸王呼圖克特穆爾之子綱阿塔
詔給伊喇薩納分行省印丁丑興和路鷹坊及蒙古民
萬一千一百餘戶大雪畜牧凍死賑米五千石戊寅樞
密院臣言天厯兵興以揚州重鎮嘗假淮東宣慰司以
兵權今事已寧宜以所部兵復隸河南行省又征西元
帥府自奉定初調兵四千一百人戊隆拉額齊訥期以
五年為代今已十年逃亡者衆宜加優卹以來歲五月
代還並從之己卯封覺特班為幽國公庚辰左右欽察

衛軍士千四百九十戶饑命上都留守司賑之辛巳以
戶部尚書耿煥為中書參知政事癸未詔養雅克特穆
爾之子塔喇海為子賜居第及所籍李彥通貨產荆王
伊蘇額布根獻犛牛四百詔每歲樞密院宗正府遣官
與遼陽行省官巡歷諸郡毋令諸王所部擾民隆祥司
使鴻和爾布哈言海南所建大興龍普明寺工費浩繁
黎人不勝其擾以故為亂詔湖廣行省臣伊嚕布哈及
宣慰宣撫二司領其役命廉訪司涖之辛卯諸王色埒

默遣使者七十四人來賑左欽察衛薩都等伊勒都額爾古駐冬軍千五百八十戶諸鹽課鈔以十分之一折收銀銀每錠五十兩折鈔二十五錠乙未敕宮相都總管府勿隸昭功都總使府丁酉以南陽府之嵩州更賜巴延為食邑十二月戊申陝西行臺御史訥古伯高坦等劾奏本臺監察御史陳良恃勢肆毒徇私破法請罷職籍贓遣歸田里有旨雖會赦其准風憲例追奪勅命餘如所奏以黃金符鐫文曰翊忠徇義迪節同勲賜西域

親軍副都指揮使竒徹以旌其天厯初紅橋戰功壬子復命諸王呼喇珠還鎮雲南癸丑薩都獻烏魯斯十六戶酬以銀百七錠鈔五千錠以河間路清池南皮縣牧地賜烏魯斯駐冬仍以呼哩所牧官羊給之河南河北道廉訪副使僧嘉努言自古求忠臣必于孝子之門今官于朝者十年不省覲者有之非無思親之心實由朝廷無給假省親之制而有擅離官次之禁古律諸職官父母在三百里于三年聽一給定省假二十日無父母

者五年聽一給拜墓假十日以此推之父母在三百里以至萬里宜計道里遠近定立假期其應省覲匿而不省覲者坐以罪若詐冒假期規避以掩其罪與詐奔喪者同科御史臺臣以聞命中書省禮部刑部及翰林集賢奎章閣議之丁巳雨水冰戊午西域諸王圖烈特穆爾遣使獻西馬及葡萄酒預給四宿衛及諸潛邸衛士歲賜鈔人二十錠庚申遣集賢直學士達實密詣真定玉華宮祀睿宗及顯懿莊聖皇后神御殿辛酉遣兵部

尚書伊蘇布哈同僉通政院事哈努勒布哈迎帝師詔
中書省御史臺遣官詣各道同廉訪司錄囚癸亥雨水
冰給征東元帥府兵仗丁卯御史臺臣言甘肅行省平
章伊魯特穆爾既非蒙古族姓且闇事機不宜使總兵
柄詔樞密院勿令提調軍馬己巳御史臺臣言河東道
廉訪副使和濟格爾布哈僉燕南道廉訪司事布延呼
圖克王士元郝志善憲綱不振宜免官從之旌寧海州
崔惟孝孝行是歲真定路屬州水冀寧河南二路旱大

饑

元史卷三十五

元史卷三十五考證

正月己卯御製奎章閣記 按昭儉錄及趙汭東山集
皆云帝建奎章閣命虞集撰記御書刻石道園學古
錄載記文末書四月日記與此互異

甕河寨主 原刻作壅河據永樂大典及南監本改

常賦外歲增輸金五千兩銀七百兩 按天歷二年本
紀載每歲會入之數金五百二十七錠而此處景東
一府乃增輸至五千兩銀僅七百兩其多少懸殊不

應至是疑五千乃五十之訛也

欽定四庫全書蒼要卷六千四百十五 史部

元史卷三十六

明翰林學士亞中大夫知制誥兼修國史宋濂等修

本紀第三十六

文宗五

三年春正月辛未朔高麗國王楨遣其臣元忠奉表稱
賀貢方物癸酉命高麗國王王燾仍爲高麗國王賜金
印初燾有疾命其子楨襲爵至是疾愈故復位甲戌賜

雅克特穆爾妻公主伊魯勒金五百兩銀五千兩丁丑
禁冒哀求敘復者賑糶米五萬石濟京師貧民己卯時
享太廟罷諸建造工役惟城郭河渠橋道倉庫勿禁廣
西羅韋里叛寇馬武沖等合龍州嶺北朗龍洞韋大蟲
賊兵萬人攻陷那馬遠那馬安等砦命廣西宣慰司嚴
軍禦之伊徹察喇冒請衛士芻束當坐罪雅克特穆爾
請釋之壬午命甘肅行省建邠王布延特穆爾居第封
孔子妻鄆國夫人元官氏爲大成至聖文宣王夫人癸

未給納琳等十四驛糧及芻粟賑永昌路流民慶遠南丹等處溪洞軍民安撫司言所屬宜山縣饑疫死者衆乞以給軍積穀二百八十石賑糶從之江西行省言梅州頻年水旱民大饑命發粟七百石以賑糶丙戌印造歲額鈔本至元鈔九十九萬六千錠中統鈔四千錠丁亥幸大承天護聖寺賜諸王特穆爾及其妃阿爾徹伯爾金五百兩銀萬兩鈔二萬錠幣帛各千匹監察御史劾奏翰林學士承旨達哈其兄阿哩雅坐誅當罷從之

戊子萬安軍黎賊王奴羅等集衆五萬人寇陵水縣已
丑賑肇慶路高要縣饑民九千五百四十口四川行省
言去年九月左丞特穆爾布哈與祿余賊兵戰被創賊
遂侵境乞調重慶敘州兵二千五百人往救之順元宣
撫司亦言賊列行營爲十六所乞調兵分道備禦詔上
都留守司建雅克特穆爾居第御史臺言選除雲南廉
訪司官多託故不行繼今有如是者風憲勿復用制可
戊戌命中書省以鈔三千錠幣帛各三千匹給皇子古

噲達喇歲例鷹犬回賜諸王章吉特獻俄羅斯百七十人酬以銀七十二錠鈔五千錠己亥給俄羅斯千人衣糧山南道廉訪副使圖沁多阿克劾荆湖北道宣慰使必里克圖嘗貸內府鈔威逼部民代償不足則以公帑鈔償之又副使羅矩以修治沿江堤岸縱家奴掊斂民財二人罪雖遇赦宜從黜退御史臺臣以聞從之庚子封公主布尼雅為鄆安大長公主夔路忠信寨洞主阿具什用合洞蠻八百餘人寇施州二月辛丑朔八番苗

蠻駱度來貢方物癸卯諸王額森特穆爾薨甲辰諸王
達爾瑪實哩哈爾滿各遣使來貢蒲萄酒西馬金鴉鶻
乙巳以湖廣行省平章伊嚕布哈為陝西行臺御史大
夫給邠王及其王傅祿戍申雲南行省言會通州土官
阿賽及河西阿勒等與羅羅斯兵千五百人寇會州路
之卜龍村又祿余將引兵與茫部合寇羅羅斯截大渡
河金沙江以攻東川會通等州臣等奉先所降詔書招
諭之不奉命則從宜進軍制可己酉賜集賽官諤勒哲

持穆爾及阿薩爾珠衣帽德寧路去年旱復值霜雹民
饑賑以粟三千石旌晉寧路沁州劉瑋妻張氏志節祿
余言于四川行省自父祖世為烏撒土官宣慰使佩虎
符素無異心曩為布呼誘脇比聞朝廷招諭而今期限
已過乞再降詔赦即率四路土官出降仍乞改屬四川
省隸永寧路冀得休息四川行省以聞詔中書樞密御
史諸大臣雜議之己未旌寧夏路趙那海孝行辛酉雅
克特穆爾兼奎章閣大學士領奎章閣學士院事己巳

命雅克特穆爾集翰林集賢太禧宗禋院議立太祖神

御殿詔修曲阜宣聖廟邛州有二井宋舊名曰金鳳茅

池天歷初九月地震鹽水湧溢州民侯坤願自煮鹽而

輸課於官詔四川轉運鹽司主之旌濟州任城縣王德

妻秦氏婺州路金華縣吳埧妻宋氏廬州路高仁妻張

氏甘州路烏呼納妻錫林蓋州完顏特爾格齊妻李氏

志節三月庚午朔帝師至京師遣使往西域賜諸王保

賽音繡綵幣帛二百四十匹中書省臣言凡遠戍軍官

死而歸葬者宜視民官例給道里之費又四川驛戶比
以軍興消乏宜遣官同行省賑之制可雅克特穆爾言
平江松江澱山湖圩田方五百頃有奇當入官糧七千
七百石其總田者死頗為人占耕今臣願增糧為萬石
入官令人佃種以所得餘米贍臣弟薩都從之洛水溢
瓜哇國遣其臣僧伽刺等八十三人奉金書表及方物
來朝貢己卯詔西寧王斯隆瑪鎮禦有勞其如安定王
多爾濟巴勒例置王傅官四人鑄印給之庚辰以安陸

府賜并王鴻和爾布哈為食邑旌大都良鄉縣韋安妻
張氏貞節丁亥諸王巴約特諤勒哲特穆爾來朝戊子占
城國遣其臣阿南那那里沙等四人奉金書表及方物
來朝貢己丑復立功德使司癸己皇子古嚕達喇更名
雅克特古斯置興瑞司掌中宮歲作佛事秩正三品乙
未命雅克特穆爾復以鈔萬錠分給蒙古孤寡帝師泛
舟于西山高梁河調衛士三百挽舟丙申賜集賽官都
稜特穆爾璽書申飭其所部賑摩琳苦鹽灤扎哈碩隆

九驛之貧者凡四百五十二戶丁酉緬國遣使者阿落
等十人奉方物來朝貢已亥賜行樞密院鈔四萬錠分
給征烏撒烏蒙所調陝西四川蒙古軍及漸丁萬人高
唐德冀諸州大名汴梁廣平諸路有蟲食桑葉盡夏四
月壬寅中書省臣言去歲宿衛士給鈔者萬五千人今
減去千四百人餘當給者萬三千六百人又太府監歲
支幣帛二萬匹不足於用請再給二百匹並從之四川
師壁散毛盤速出三洞蠻野王等二十三人來貢方物

戊申大寧路地震四川大盤洞謀者什用等十四人來
貢方物丙辰諸王布斯必均凌遣使者烏呼納等及西
域諸王保賽音使者額森特穆爾等皆來貢方物戊午
命奎章閣學士院以國字譯貞觀政要鐫板模印以賜
百官四川行省平章汪壽昌辭職不允以作佛事祈福
釋御史臺所囚定興劉縣尹及刑部囚二十六人乙丑
安南國世子陳日焯遣其臣鄧世延等二十四人來貢
方物安西王阿南達之子伊嚕特穆爾與輝和爾僧烏

尼德巴迪爾班第國師沙津阿固齊喇特納實哩謀不
軌命宗王大臣雜鞠之獄成三人皆伏誅仍籍其家以
沙津阿固齊喇特納實哩妻徹辰賜通政副使布琳
玉鞍賜薩都餘人畜土田及七寶奩具金珠寶玉鈔幣
並沒入大承天護聖寺免四川行省境內今年租命有
司為巴延建生祠立紀功碑于涿州仍別建祠立碑于
汴梁戊辰免雲南行省田租三年安州饑給河間鹽課
鈔萬錠賑之東昌濟寧二路及曹濮諸州皆有蟲食桑

五月己巳朔高昌王藏吉薨其弟太平努襲位壬申賑

摩琳七里等二十三驛人米二石癸酉熒惑犯東井賜

雅克特穆爾宴于流盃池雲南大理中慶等路大饑賑

鈔十萬錠甲戌陞尚舍寺為從三品薩題請備錄皇上

登極以來固讓大凡往復奏答其餘訓敕辭命及雅克

特穆爾等宣力效忠之蹟命多喇續為蒙古托卜齊延

一書置奎章閣從之賜湖廣行省平章托音納爾金虎

符旌保定路郭壽孝行塔坦妻凌布賢孝戊寅幸大承

天護聖寺京師地震有聲己卯命諸王伊寶巴勒還鎮
浙西廉訪司劾副使三寶凶惡陰險紊亂紀綱詔罷之
壬午復賑糶米五萬石濟京城貧民戊子騰吉斯以疾
先住上都賜藥價鈔千錠遣使往帝師所居薩斯嘉之
地以珠織制書宣諭其屬仍給鈔四千錠幣帛各五千
匹分賜之賑特哩袞布拉克額布齊袞等十九驛人米
二石庚寅大駕發大都巡狩上都置山東益都等處金
銀銅鐵提舉司辛卯復以司徒印給萬安寺僧嚴吉祥

詔給鈔五萬錠修帝師帕克斯巴影殿壬辰太常博士
王瓚言各處請加封神廟濫及淫祠按禮經以勞定國
以死勤事能禦大災能捍大患則祀之其非祀典之神
今後不許加封制可丁酉白虹並日出長竟天追封顏
子父顏無繇為杞國公諡文裕母齊姜氏杞國夫人諡
端獻妻宋戴氏充國夫人諡貞素甘州大電揚州之江
都秦興德安府之雲夢應城縣水汴梁之睢州陳州開
封之蘭陽封邱諸縣河水溢滹沱河決沒河間清州等

處屯田四十三頃常寧州饑賑糶米二千四百石杭州
火被災九十一戶池州火被災七十三戶命江浙行省
量賑之六月己亥朔以伊魯特穆爾等罪詔告中外赦
天下免四川行省今年差稅陝西行省今年商稅錄用
托多王士熙托歡等己酉以御史中丞趙世安為中書
左丞癸丑遣使分祀嶽鎮海瀆戊午給鈔五萬錠賜雲
南行省為公儲己未雅克特穆爾言巴延封浚寧王賜
食邑嵩州今請於瀕汴擇一州賜之詔改賜陳州癸亥

加授知樞密院事額布勒開府儀同三司乙丑御史臺

臣劾遼陽行省參政賽富昂庸鄙不勝任罷之監察御

史陳思謙言內外官非文武全才出處繫天下安危能

拯金革之難者勿許奪情起復制可禁諸卜筮陰陽人

毋出入諸王公大臣家晉寧冀州桑災益都濟寧大雨

無為州和州水旌歸德府永城縣民張氏孝節秋七月

戊辰朔諸王達爾瑪實哩等遣使來貢虎豹雲南行省

言本省舊降給驛璽書六十九金字圓符四布呼之亂

散失殆盡乞更賜為宜敕更賜璽書三十二圓符四仍
究詰所失者辛未以車坊官園賜已延賜從征雲南將
校三百四十七人鈔幣有差調軍士修柳林海子橋道
乙亥命僧於鐵幡竿修佛事施金百兩銀千兩幣帛各
五百匹布二千匹鈔萬錠丁丑賑蒙古軍流離至陝西
者四百六十七戶糧三月遣復其居戶給鈔五十錠湖
廣行省言黎賊勢猖獗乞益兵三千以備調用有旨依
前詔促伊喇薩納剋日進兵壬午江西行省造螺鈔凡

榻遺雅克特穆爾詔賜匠者幣帛甲申雅克特穆爾獻
俄羅斯二千五百人旌裕州民李庭瑞孝行庚寅給鈔
萬錠命雅克特穆爾分賜累朝宮分嬪御之貧者壬辰
西域諸王保賽音遣哈智怯瑪昂以七寶水晶等物來
貢給蒙古民及各部衛士鈔幣有差仍賑糧五月甲午
北邊諸王伊濟貝遣納古爾等來朝貢雅克特穆爾言
諸王齊齊克圖沙格曩流南荒乞賜矜閔俾還本部從
之賑宗仁衛軍士九百戶各鈔一錠滕州民饑賑糶米

二萬石慶都縣大饑以河間鹽課鈔萬錠賑之八月辛
丑諸王阿哩雅實哩獻俄羅斯三十人漸丁百三人賑
大都寶坻縣饑民以京畿運司糧萬石癸卯吳王瑪納
濟諸王特屯哈哈索諾木袞布特穆爾齊特們德爾等
來朝賜護守上都宮殿衛卒二千二百二十九人人鈔
二十五錠乙巳天鼓鳴于東北丙午遣官祭社稷丁未
有事于太廟海道漕運糧六十九萬餘石至京師己酉
隴西地震帝崩壽二十有九在位五年癸丑靈駕發引

葬起輦谷從諸帝陵元統二年正月己酉太師右丞相
巴延率文武百官等議上尊諡曰聖明元孝皇帝廟號
文宗國言諡號曰濟雅圖皇帝請諡于南郊三月己酉
祔于太廟後至元六年六月以帝謀為不軌使明宗飲
恨而崩詔除其廟主放雅克特古斯於高麗未至伊徹
察喇害之於中道

元史卷三十六

元史卷三十六考證

監察御史陳思謙言 按思謙疏內尚有請革銓選之

弊三策見宋元通鑑本紀未載

命僧于鐵幡竿修佛事 按鐵幡竿係渠名在上都西

山即今多倫諾爾界元周伯琦近光集有鐵剎標山
影之句原注云上京西山上樹鐵竿高數十丈以其

下海中有龍故用梵家說鎮之又楊允孚灤京雜咏
詩云鐵幡竿下草如茵注云即鄂爾多據此則渠上



舊固有寺且有行宮駐蹕之所而今不可考也

放雅克特古斯于高麗 按原刻除其廟主下有於燕

遐之後祖母太皇太后等語文義不順考宋元通鑑

順帝至元六年六月下詔撤文宗廟主其畧曰昔我

皇祖武宗皇帝云云順帝本紀亦備載之此處蓋即

敘其事并錄其詔詞而顛倒錯亂至不可讀且父宗

名圖卜特穆爾原文作圖帖睦詔內又改作脫脫

木兒皆當時載筆之誤考永樂大典所錄則此下即

云放雅克特古斯于高麗未至伊徹察刺害之于中
道以詔詞詳載順帝紀中故從刪節也深合紀載之
體今從之



總校官編修臣吳紹深

財團法人
佛陀教育基金會
釋淨空
敬贈

